

IUDE ENA URIURI

Sunuma mamohoina enana ta ialai, eo lauheata udoi ribahesanapuenta.

¹Iude Iesu Keriso ena heaheari tauna eo Jamesi ena tau mamohoi, isi se eogahaidi wa enadi ina, isi wa Tamada i gadosisiedi eo se goraidi Iesu Keriso enana:

²Nuatoatoa bena enamiu, loni eo gadosisi bena se helaiyawa hinage.

³Egu nuanuai e, nuagu i gigibori ariri bena enamiu ea uri, eda mauri esega, omi eo ai, ribana iaede i duduigu bena ea uri ea aibodaimiu eda sunuma ta enana au iala adidiri, sunumana iaede se mose-esegai wa, hetabu tataodi aridi eai. ⁴Paana tatao headi boeada eai se lusora-eamuyamuima, beabeana eai giru lailai ta se abiyao, isi Eaubada tau-miamurimuriena, eda Guiau ainaiuana se tore-bui i hemala matamataye'o, eo tanuagada esega dumaduma eda Guiau Iesu Keriso se halelei.

⁵Ina ea henua bena ginauri headi ea henuaisinidiwa, ginauri ta abidi au atao beabeana, iaede Guiau ena tataoyao Aigupito eai i hemauidio, abotai murina eai headi i unuidi paana ia nige se ataiwatai. ⁶Aneru headi hinage, nige edi teha eai se miahai na edi abamia mamohoi se laugabaei, ia i paldi, auaudi se otahai i lau e nige nosina, i lau e hedudurai asubenana saesaena eai. ⁷Doha Sodoma eo Gomora eo eanua headi gegesidi eai edi laulau, se moseuioidi enoeno-biri arinai, eo buluma dobilana se bui se abiudoiei, isi se hemala eda tautau, maisadi oegi alaalasi se hearo, nige anasiga.

⁸Hinage doha edi enoenosuai eai bulumana se hebii, tanuaga se isugaraedi, ginauri lolodi, saesaedi, se alaliuliuaidi. ⁹Na Mikaela, aneru saesae-aririna, maena diabololo Mose sinarena se haiabie wa, ia nige gonoana bena riba adiadidiri arinai i lauhegiru, arinai i ene, "Guiau i ribasuum." ¹⁰Na ina tatao ta ginauri nige abidi se ata na se riba-siosiololoedi, na ginauri headi se nuatuidi se lolo, doha suisui nige nuadi ia mo ginauri headi se nuatuidi se lolo, isi ede aridi eai abo se hebaaeauioidi. ¹¹Ahani isi! Kaina ena dobila eai se laulau, se

gado gogo to Balama ena ponori arinai se gabauioidi, eo Koraha ena oipiri arinai se mate. (Num. 22.24, 26) ¹²Ina tatao ta doha masi baaeana, maemiuyao au heyaugogo emi gadosisi-mataasina huiadi eai, isibom mo se heaheaiuioidi, nige se matausi; isi doha eada nige goiladi mana se arulaedi; isi oeagi ma-lugu-wowowoeadi, taba nige se ua, se matearirio, ma-labui lamdi eai se laahaidio; ¹³doha gabogabo eai butubutu lailaidi, se butubutu, taumaeamaeadi se hepupurosaedi; ipora tatatausidi isi, amuamumu eo masigiri teha ubu eai abo enadi, i lau nige nosina.

¹⁴Isi Enoka i riba-perovetaidi, ia Adamu eai i laoma isina hehaligigilabuina wa, i ene, “Au ita, Guiiau i laoma maena hetabu-tataoyao, tausani saudoudoidi hisa, ¹⁵ena hedudurai bena i hepaisoaei tatao gamagaridi aridi eai, Eaubada tau-miamurimuriena edi miasuara paisoadi gamagaridi bena i hetaladi, iaede isi Eaubada nige se nuatui wa se abiabini, eo riba oioiuradi gamagaridi arinai tatao baaea, Eaubada nige se nanabuei, ia se riba-baaeai. ¹⁶Isi tau-monunu, tauawaawayagara, isibom edi lelehi eai tau-laulau, awadi se lai ariri se riba-pasipasi, tatao mo se hebihebigadi, isibom bena edi abahelolouioidi.

¹⁷Na omi mo, egu nuanuai e, eda Guiiau ena aposotolo edi ribahesanapu bena au henuhenuaisinidi; ¹⁸se riba arimiu eai wa si ene, “Huia murimurita eai tautisuisugara abo se laoma, Eubada abo se toro-murimuriei isibom edi lelehi gaibu eai se laulau.” ¹⁹Isi ede tatao abo se abiabi-hineridi, tanoubu ta tataodi, Earua nige se abi. ²⁰Na omi, egu nuanuai e, emi sunuma hetabu-aririna eai ta, au headidiriuioimiu; Earua Tabuna boeana eai au laulau-uura; ²¹au taididiniuiioimiu Eaubada ena gadosisi boeana eai; Guiiau Iesu Keriso ena nuatoatoa au eooi, mauri nige nosina dobilana ede. ²²Headi sora ma-nualabulabuidi, se nuatoatoa au saguidi se italobai mamohoi; ²³headi au abihemauridi, doha oeagi alaalasi boeana eai au girihaidi; headi au nuatoatoaidi ma-matausimiu, ata bena adi lulu mo na paana buluma laulauna eai se hebiidio arinai au hewaiunuei mo.

²⁴Ia wa abina i ata i abididiniimiu taba nige au beu, eo iabom namanamarina nuanuana eai i abihetormiu nige emi baaea, eo ma-kodeariaririmiu, ²⁵Eaubada tahunuana Tauhemaurida, Iesu Keriso eda Guiiau debana eai, enana se moseyao wasawasana, tanutanuagana-maudoina, eo gigiborina, beabea-aririna eai eo huiana sora, eo abo-ina ta, eo i lau e nige nosina. Amen.